

Inisiatif Wilayah Peduli diteruskan

KUALA LUMPUR – Kementerian Wilayah Persekutuan meneruskan program di bawah Inisiatif Wilayah Peduli pada tahun ini dengan merancang 160 program induk dengan melibatkan peruntukan sejumlah RM49 juta sebagaimana tahun lepas.

Datuk Bandar Kuala Lumpur, Datuk Nor Hisham A. Dahlan berkata, pada tahun lepas sebanyak 469 program berjaya dilaksanakan dalam menjaga kebajikan golongan memerlukan, meringankan kos sara hidup dan menaikkan taraf hidup rakyat melibatkan golongan kanak-kanak, remaja, belia dan warga emas.



NOR HISHAM

“Saya menggesa semua orang untuk terlibat secara aktif dalam aktiviti ini agar dapat membantu mereka yang memerlukan supaya kita semua boleh berjaya bersama,” katanya ketika berucap dalam Majlis Malam Apresiasi Inisiatif Wilayah Peduli 2019 di sini baru-baru ini.

Menurut Nor Hisham, sebahagian besar program tersebut diadakan berjaya meningkatkan integrasi kaum dan masyarakat serta menaik taraf kualiti hidup penduduk.

“Terdapat juga 22 program yang diadakan untuk membantu melatih, membiayai dan menyediakan kemudahan untuk menaikkan usahawan muda.

“Di samping itu, 41 program telah dianjurkan untuk menangani masalah sosial dengan cara sukan dan aktiviti rohani selain 11 program membantu melengkapkan orang kurang upaya dengan kemahiran supaya mereka dapat memperoleh pendapatan,” katanya.

Nor Hisham berkata, program yang dijalankan juga tidak meminggirkan golongan gelandangan apabila sebanyak 11 program telah dijalankan untuk mereka.

“Program-program ini bertujuan untuk memotivasikan mereka serta membantu mendapatkan peluang pekerjaan untuk golongan gelandangan,” katanya.

Program di bawah Inisiatif Wilayah Peduli adalah Jati Diri, Kesejahteraan Wilayah, Menyantuni Gelandangan, Ekonomi Belia, Pembangunan OKU, Bas Go KL, Van Wilayah, Bantuan Peralatan Kesihatan dan Bas Medik.

Terdahulu pada majlis itu, beberapa persatuan penduduk, pertubuhan bukan kerajaan, korporat dan agensi kerajaan menerima sijil penghargaan daripada Nor Hisham.

Para tetamu turut dihiburkan dengan persembahan oleh kumpulan Orkestra Dewan Bandaraya Kuala Lumpur (DBKL) dan artis dari Jabatan Kesenian dan Pelancongan DBKL.